

Odžak, 07.04.2010.godine

Broj: 137/10

**ZAPISNIK I ZAKLJUČCI SA OSME SJEDNICE
PREDSJEDNIŠTVA SKUPŠTINE SAVEZA OPĆINA I GRADOVA
FEDERACIJE BOSNE I HERCEGOVINE**

U Odžaku je dana 07.04.2010. godine održana Osmo sjednica Predsjedništva Skupštine Saveza općina i gradova Federacije Bosne i Hercegovine (u daljem tekstu: Savez).

Sjednici Predsjedništva Saveza prisustvovalo je **8** članova, i to:

1. **g-din Husejin Smajlović**, načelnik Općine Zenica,
2. **g-din Hasan Ajkunić**, načelnik Općine Bugojno,
3. **g-din Luka Jurić**, načelnik Općine Odžak,
4. **g-din Amer Čenanović**, načelnik Općine Ilidža,
5. **g-din Salem Dedić**, načelnik Općine Jablanica,
6. **g-din Rasim Omerović**, načelnik Općine Kalesija,
7. **g-din Muhamed Ramović**, načelnik Općine Goražde, i
8. **g-din Vlado Alilović**, načelnik Općine Vitez.

Pored gore navedenih, sjednici su prisustvovali i: **g-din Derviš Šaćirović**, predsjedavajući Općinskog vijeća Općine Odžak, **g-din Mensur Jašarspahić – Suri**, načelnik Općine Kakanj, **g-din Emir Bubalo**, načelnik Općine Konjic, **g-din Esad Jelešković**, savjetnik načelnika Općine Novi Grad, **g-din Mario Vignjević**, program koordinator SIDA-e (Švedska agencija za međunarodni razvoj i saradnju u BiH), **g-din Slaviša Šućur**, GAP (Projekat upravne odgovornosti), **g-din Hazbo Ličina**, direktor Uprave za imovinsko-pravne, geodetske poslove i katastar nekretnina u Općini Zenica, **gđa Vesna Travljanin**, direktor Saveza, **gđa Selma Fišek**, saradnik za pravna pitanja, **g-din Amir Kupusija**, viši saradnik za informisanje i odnose sa javnošću i **g-din Edin Demirović**, saradnik za lokalnu samoupravu.

G-đa Travljanin pozdravlja prisutne i prenosi izvinjenje g-dina Ermina Hajdera i g-đe Dragane Solaković zbog nemogućnosti prisustvovanja sjednici. G-din Jurić zahvaljuje Savezu što je Općina Odžak izabrana za domaćina Osme sjednice Predsjedništva. Nakon toga je održao petnaestominutnu prezentaciju o Općini Odžak. G-din Smajlović zahvaljuje g-dinu Juriću na gostoprimstvu, otvara Osmu sjednicu Predsjedništva i predlaže Dnevni red na usvajanje.

Jednoglasno je usvojen izmijenjeni Dnevni red i to sa slijedećim predloženim izmjenama i dopunama:

Pod tekuća pitanja, kao tačka 8f dodaje se informacija o projektu „Naša realnost“ i tačka 4. razmatra se kao prva tačka Dnevnog reda.

G-din Jašarspahić predlaže da se za slijedeću sjednicu ispita da li i koliko kreditnih sredstava dobivenih od strane MMF-a, kantoni raspoređuju općinama na svom području, s obzirom na činjenicu da općine Zeničko-dobojskog kantona ne dobijaju ništa po ovom osnovu.

1. Projekat SIDA-e (Švedska agencija za međunarodni razvoj i saradnju u BiH) - „Jačanje kapaciteta Saveza“

Izjavitelj: Mario Vignjević, program koordinator

G-din Vignjević izvještava o SIDA projektu „Jačanje kapaciteta Saveza“ koji podrazumjeva zapošljavanje dva uposlenika u Savez na period od tri godine i to jednog pravnog i jednog finansijskog eksperta i također o nizu aktivnosti vezanih za projekat. Ukupna vrijednost projekta iznosi 1,6 miliona eura. Početak implementacije projekta je predviđen za septembar 2010. godine. Savez bi trebao predložiti osobe u Savjetodavni tim koji će usmjeravati aktivnosti u implementaciji projekta.

G-din Smajlović otvara raspravu.

G-din Bubalo pita da li postoji mogućnost da GAP (Projekat upravne odgovornosti) pruži pomoć u implementaciji Zakona o principima lokalne samouprave u Federaciji Bosne i Hercegovine, s obzirom na činjenicu da viši nivoi vlasti ne konsultuju putem Saveza jedinice lokalne samouprave u postupku donošenja zakona koji ih se direktno tiču.

G-din Slaviša Šućur konstatuje da postoji niz zakona na kojima Savez radi u skladu sa raspoloživim kapacitetima i da u tome i GAP pruža pomoć. Međutim potrebno je urediti prioritete, jer Vlada Federacije Bosne i Hercegovine nije spremna sistemski pristupiti zahtjevima jedinica lokalne samouprave.

G-din Bubalo smatra da je potrebno mijenjati Zakon o principima lokalne samouprave u Federaciji Bosne i Hercegovine, tako što bi se u postupku konsultovanja jedinica lokalne samouprave od istih tražila saglasnost, a ne mišljenje.

G-din Smajlović zahvaljuje na raspravi i konstatuje da je informacija primljena k znanju.

2. Usvajanje Zapisnika i Zaključaka sa Sedme sjednice Predsjedništva

Zapisnik i Zaključci sa Sedme sjednice Predsjedništva su jednoglasno usvojeni.

3. Izvještaj o izvršenju finansijskog plana Saveza općina i gradova Federacije Bosne i Hercegovine za 2009.godinu sa stavom Nadzornog odbora

Izjavitelj: Vesna Travljanin, direktor Saveza

G-đa Travljanin obavještava članove Predsjedništva da su u materijalima za sjednicu uz Izvještaj o izvršenju finansijskog plana Saveza općina i gradova Federacije Bosne i Hercegovine dobili i stav Nadzornog odbora koji predlaže Predsjedništvu da usvoji ponuđeni Izvještaj. G-đa

Travljanin iznosi i činjenicu da je naplativost članarina 77%, dok je u prethodnoj godini iznosila 99%.

G-din Smajlović otvara raspravu i konstatuje da je jednoglasno usvojen Izvještaj o izvršenju finansijskog plana Saveza općina i gradova Federacije Bosne i Hercegovine sa stavom Nadzornog odbora za 2009. godinu.

4. Prijedlog Budžeta Saveza općina i gradova Federacije Bosne i Hercegovine za 2010.godinu

Izjestilac: Vesna Travljanin, direktor Saveza

5. G-đa Travljanin ukratko izvještava o prijedlogu Budžeta Saveza općina i gradova Federacije Bosne i Hercegovine za 2010.godinu uz napomenu da nema većih odstupanja u odnosu na prethodnu godinu.

G-din Smajlović otvara raspravu i konstatuje da je prijedlog Budžeta jednoglasno usvojen.

6. Izvještaj sa sastanka sa Premijerom Federacije Bosne i Hercegovine

G-đa Travljanin izvještava o sastanku delegacije Saveza koju su činili: g-đa Vesna Travljanin, direktor Saveza, g-din Amer Čenanović, načelnik Općine Ilidža, g-din Salem Dedić, načelnik Općine Jablanica i g-din Hakija Osmić, načelnik Općine Zavidovići sa g-dinom Mustafom Mujezinovićem, Premijerom Vlade Federacije BiH. Teme sastanka su bile: raspored kreditnih sredstva Međunarodnog monetarnog fonda i zakonodavne aktivnosti Saveza. Premijer Mujezinović je predstavnike općina uputio na nadležna kantonalna ministarstva u vezi sa sredstvima MMF-a.

G-din Čenanović navodi da se nije razgovaralo o nekim suštinskim stvarima nego se Premijerovo usmjerenje više odnosilo na Prijedlog zakona o plaćama i naknadama u organima vlasti Federacije Bosne i Hercegovine.

G-din Šućur smatra da bi Savez trebao poslati pismo Parlamentu Federacije BiH – Komisiji za lokalnu samoupravu Predstavničkog doma, Premijeru Federacije BiH, Federalnom ministarstvu finansija/financija i Federalnom ministarstvu pravde oko pitanja koja su ključna za Savez i o kojima je bilo riječi na sastanku sa Premijerom Mujezinovićem. Federacija ne može regulisati propise vezane za visinu plata za zaposlene na lokalnom nivou vlasti.

G-din Dedić se uključuje u raspravu i ističe da je Savez ostavio loš dojam s obzirom da u delegaciji Saveza koja se sastala sa premijerom nisu bili predsjedavajući Skupštine Saveza i predsjednik Predsjedništva Skupštine Saveza.

G-din Smajlović predlaže da se napravi lista svih zakona koji su usvojeni nakon stupanja na snagu Zakona o principima lokalne samouprave u Federaciji BiH („Službene novine FBiH“, broj: 49/06), koji se tiču jedinica lokalne samouprave, a pri čijem donošenju iste nisu konsultovane.

G-din Ajkunić smatra da je ovo dobar prijedlog.

G-din Alilović također smatra da treba uputiti pismo Premijeru Federacije BiH.

Jednoglasno je usvojen zaključak da se Premijeru Federacije BiH i kantonalnim Premijerima uputi pismo u kojem će se tražiti poštivanje odredbi Zakona o principima lokalne samouprave u Federaciji BiH u segmentu obaveznog konsultovanja jedinica lokalne samouprave putem Saveza pri izradi zakona koji ih se direktno tiču, u suprotnom Savez će biti prinuđen obratiti se Ustavnom sudu Federacije Bosne i Hercegovine sa zahtjevima za preispitivanje povrede prava na lokalnu samoupravu u vezi sa zakonima u čijem donošenju jedinice lokalne samouprave nisu konsultovane.

Također je zaključeno da se napravi lista zakona koji su usvojeni nakon stupanja na snagu Zakona o principima lokalne samouprave u Federaciji BiH („Službene novine FBiH“, broj: 49/06), koji se tiču jedinica lokalne samouprave, a pri čijem donošenju iste nisu konsultovane.

7. Zakonodavne aktivnosti Saveza:

a) Zakon o šumama

G-din Omerović, kao član Radne grupe Saveza za izradu Zakona o šumama, obavještava Predsjedništvo da je postojala potreba i interes od strane jedinica lokalne samouprave da se nastavi raditi na ovom zakonskom tekstu. Ističe da su izvršene konsultacije sa Šumarskim fakultetom i Udruženjem šumarskih inženjera i tehničara i da oni podržavaju tekst nacrtu Zakona o šumama koji je uradila Radna grupa Saveza.

G-din Bubalo ističe da se Predsjedništvo mora dogovoriti oko toga kako će se nacrt Zakona o šumama uputiti u parlamentarnu proceduru, odnosno ko će biti ovlašteni predlagač.

G-din Šućur smatra da bi prije upućivanja nacrtu u parlamentarnu proceduru bilo dobro organizovati tematsku sjednicu u Parlamentu Federacije BiH gdje bi bile pozvane sve relevantne osobe i izražava spremnost da on zajedno sa Nusretom Sirčom i Enverom Mujalom budu predlagači ovog zakona s obzirom na činjenicu da imaju to pravo kao poslanici u Predstavničkom domu Parlamenta Federacije BiH.

G-din Omerović ističe da je najjednostavniji način da se nacrt uputi u proceduru preko poslanika.

G-din Bubalo konstatuje da se treba požuriti sa tim aktivnostima.

Jednoglasno je zaključeno da se nacrt Zakona o šumama koji je uradila Radna grupa Saveza uputi svim poslanicima u Predstavničkom domu Parlamenta Federacije BiH i svim delegatima u

Domu naroda Parlamenta Federacije BiH, Ministarstvu poljoprivrede, vodoprivrede i šumarstva te da se nastave aktivnosti na lobiranju za usvajanje ovog nacrtu Zakona o šumama.

b) Zakon o premjeru i katastru nekretnina

G-din Jašarspahić, kao predsjednik Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša daje riječ g-dinu Hazbi Ličini, članu Radne grupe koja radi na izradi nacrtu Zakona o premjeru i katastru nekretnina. G-din Ličina izražava zadovoljstvo iz razloga što se sve što je rečeno u vezi sa procedurama za upućivanje nacrtu Zakona o šumama u parlamentarnu proceduru, može primjeniti i na nacrt Zakon o premjeru i katastru nekretnina. Ističe da je Radnoj grupi potreban još jedan sastanak da bi završila sa radom na tekstu nacrtu.

G-din Čenanović ističe da je suština u tome da se na jednom mjestu objedine katastar i grunt i da građani imaju mogućnost da na brz način dobiju tražene podatke.

G-din Smajlović konstatuje da je usvojen zaključak da se nakon što Radna grupa završi sa tekstom nacrtu Zakona o premjeru i katastru nekretnina, održi sastanak sa predstavnicima Federalne uprave za geodetske i imovinsko-pravne poslove te da se na narednoj sjednici Predsjedništvo informiše o provedenim aktivnostima.

8. UNDP – MTS projekat - Zauzimanje stava Predsjedništva u vezi sa ulogom Saveza u sistemu obuke za jedinice lokalne samouprave u BiH

G-đa Travljanin upoznaje Predsjedništvo o MTS projektu (Sistem obuke za jedinice lokalne samouprave u BiH) i ističe da su do sada održana dva sastanka Radne grupe za izradu Strategije za obuku uposlenih u jedinicama lokalne samouprave. Naglašava da će se na slijedećem sastanku govoriti o institucionalnom okviru Sistema obuke za jedinice lokalne samouprave u BiH.

G-din Smajlović konstatuje da je Informacija primljena k znanju i da će se Predsjedništvo na narednim sjednicama izjasniti o ovom pitanju.

9. Tekuća pitanja

a) Imenovanje predstavnika Saveza za rad na pripremi podataka za sprovođenje analize Zakona o pripadnosti javnih prihoda u FBiH

G-din Smajlović predlaže g-dina Hakiju Osmića za predstavnika Saveza za rad na pripremi podataka za sprovođenje analize Zakona o pripadnosti javnih prihoda u FBiH.

Prijedlog je jednoglasno usvojen.

b) Informacija sa održanog seminara/radionice «Proces zagovaranja/lobiranja novih zakonskih rješenja»

Informacija je primljena k znanju bez dodatnih komentara i rasprave.

- c) Odgovor Federalnog ministarstva finansija na inicijativu za izmjene Zakona o raspodjeli javnih prihoda u Federaciji BiH

Predsjedništvo je informisano da je Savez dobio odgovor od Federalnog ministarstva finansija u kome se navodi da je Federalni Zakon o raspodjeli javnih prihoda utvrdio minimum koji po ovom osnovu pripada općinama, a da kanton može odrediti i veći iznos ukoliko ima sredstava.

Informacija je primljena k znanju.

- d) Najava održavanja redovne Skupštine Saveza

G-đa Travljanin izvještava Predsjedništvo da je sjednica Skupštine zakazana za 06.05.2010.godine u Neumu, dok će se sjednica Predsjedništva održati dan ranije.

Informacija je primljena k znanju.

- e) Najava održavanja radionica:

- modernizacija upravljanja općinskom imovinom
- uvođenje trezorskog poslovanja u jedinicama lokalne samouprave

Informacija o najavi radionica je primljena k znanju.

- f) Projekat „Humana općina/humani grad“

G-đa Travljanin izvještava Predsjedništvo o dosadašnjim aktivnostima Saveza sa Udruženjem građana „Naša realnost“ na projektu „Humana općina/humani grad“, te najavljuje prezentaciju projekta koju će na predstojećoj sjednici Skupštine Saveza izvršiti g-đa Drita Haziraj, direktor udruženja.

Osma sjednica Predsjedništva Skupštine Saveza općina i gradova Federacije Bosne i Hercegovine završena je u 13:30 sati.

Zapisničar
Selma Fišek, s.r.

Predsjednik Predsjedništva Skupštine
Husejin Smajlović, s.r.